



partii naleraq

UKA 2016/114-01+ 116-01

12-10-2016

Naatsorsuuserinnermut inatsisip allanngortinneqarneranik inatsisini assigiingitsuni aalajangersakkat aalajangersimasut atuutilernissaat pillugu Kalaallit Nunaannu peqqussummut Namminersorlutik Oqartussat oqaaseqaatissaat pillugu Inatsisartut aalajangiiffigisassaattut siunnersuut.

Ukiuortoortumik naatsorsuusiortarnermut inatsisip allanngortinneqarneranik inatsisini assigiingitsuni aalajangersakkat aalajangersimasut atuutilernissaat pillugu Kalaallit Nunaannu peqqussummut Namminersorlutik Oqartussat oqaaseqaatissaat pillugu Inatsisartut aalajangiiffigisassaattut siunnersuut.

(Inuussutissarsiornermut, Suliffeqarnermut Niuernermut Nunanullu Allanut Naalakkersuisoq)

Namminersorlutik Oqartussat oqaaseqaatissatut aaliangiiffigisassaattut siunnersuutit marluk inatsisit arlallit kunngip peqqussutaassa kunngip peqqussutaasigut allannguuteqarnissaat siunnersuutigineqarput. Taakku ataatsimoortillugit oqaluuserineqarnissaa innassutigineqarmat ataatsimoortillugit imannak Partii Naleraq sinnerlugu oqaaseqarfigissuagut.

Nassuerutigalugu partii naleqqamiit oqaatigisariaqarparput, kalaallit nunatsinni namminersorneq eqqunneqareernikuusoq maannamut inatsiseqarnikkut kunngip peqqussutai atorlugit ingerlatsiuarneq eqqumiiginngitsoorneqarsinnaanngimmat.

Soorunami paasisinnaavarput, inatsiseqarnikkut oqartussaaffiit akisussaaffiilu arlallit suli danskinit oqartussaaffigineqarlutillu akisussaaffigineqarmata, kisianni namminersornerup naalagaaffinngornissamullu suliniarnerup aqqani periutsip allanngortineqarnissaa pisariaqartoq isumaqarpugut.

Inatsisit kunngip peqqussutaasigut nunatsinnut atuutilersinneqartartut aamma ilaatigut EU-imi inatsiseqarnermut attuumassuteqartartorujussuit ilumut tamatigut nunatsinni kunngip peqqussutaasigut atuutilersinneqartuaannassanersut eqqarsarnartoqarpoq.

Tassami siullertut nunarput EU-mut ilaasortaannigilaq aammalu maanna periuseq, tassa kunngip peqqussutaasigut inatsisinik atuutilersitsisarneq nunasiaataanerup nalaani pissutsinik ingerlatitseqqiinertut nalilertariaqarsorinarpoq.

Taamaattumik partii naleqqamiit kaammattuutigissuarput, pissutsit nunasiaataanerup nalaani ingerlanneqartut, soorlu danmarkimi europamilu inatsisit ilaasa nunatsinnut

atuutilersinneqartarnerannut tunngasut, kunngip peqqussutaasigut atuutilersinneqartartut allanngortinneqarnissaat anguniarlugu Naalakkersuisut suliniuteqartariaqartut.

Naggataatigut apeqquserparput, ukunani siunnersuutini ilaatigut CVR-imut tunngasut aamma eqqaaneqarmata Naalakkersuisunut apeqqutigisariaqarparput, suliaq CVR-imut tunngasoq ukiaq manna aatsaat inimi maani siullermeerneqartoq, suliluunniit naammassineqanngitsoq, sioqqullugu aamma inatsisip malinnaatinneqarnissaanut tunngasoq ilanngunneqarpoq.

Taakkutsia paasiuminaappoq, tassami immikkoortoq 29 siuliani pisarput aatsaat 1. Januar 2018-imi atuutilersinneqassasoq siunnersuutigineqarmat.

Taama naatsumik oqaaseqarluta siunnersuut aappassaanneeraneqannginnerani ataatsimiititaliami susassaarfiusumi sukumiisumik oqaluuserineqarnissaa inassutingaarput.